



**Igl è reussì a la Quarta Lingua da mantegnair il dumber da commembers e sustegnì projects cun la summa da CHF 12'800.-**

### **Finamiras**

La Quarta Lingua (QL), fundada il 1972, sustegna projects da litteratura, musica, teater ed auters projects en lingua rumantscha u che stattan en connex cun quella. Ultra da quai sa chapescha la QL sco ambassadura da la quarta lingua nazionala en la diaspora, surtut en Svizra tudestga.

### **Activitads**

Durant l'onn da gestiun ha la QL sustegnì ils suandants projects:

- reediziun bilingua da texts exausts da Cla Biert (CHF 2000.-)
- "Il cavale della Greina", represchentaziuns da teater e da chant a Vrin (CHF 2000.-)
- „Lirica Anas“, nov DC (CHF 2000.-)
- Champ da teater a Tschlin (CHF 2000.-)
- Dis da litteratura 2008 (CHF 2000.-)
- „Alba da la clozza“, producziun da DC e retscha da concerts (CHF 1000.-)
- Tom da raquints biling „La chasa veglia/Das alte Haus“ dad Oscar Peer (CHF 1800.-)

Ils 28 da mars 2009 han gì lieu parallelamain las radunanzas generalas da la QL e da l'URB en l'ustaria Neumarkt a Turitg cun in program d'accompagnament cuminaivel a la fin da quellas. Davart il tema LA PRESSA (DAL DI) RUMANTSCHA: CO VINA VANT? han discutà Martin Cabalzar (schefredactor da La Quotidiana), Olivia Mosca (Website Content Manager Holcim Ltd.; avant moderatura da Radio Rumantsch) e Jon Domenic Parolini (president da la fundaziun da l'Agentura da Novitads Rumantscha ANR e president communal da Scuol). Las tesas preschentadas en rumantsch èn vegnidas projectadas per tudestg en furma d'ina resumaziun. Durant la discussiun, manada en ils idioms dals participants al podium, n'è quai betg pli stà pussaivel. Per il public narumantsch tranter ils var 50 preschents è quest'occurrenza perquai stada in pau stentusa da suandar. Da l'autra vart han las medias rumantschas rapportà davart l'occurrenza a Turitg. Là èsi resortì cler e net che l'impurtanza e las perspectivas futuras da La Quotidiana sco gasetta dal di vegnan validadas differentamain en ed ordaifer la Rumantschia.

Il november ha la QL fatg in emprim pass per colliar ils uffants da geniturs da lingua rumantscha che vivan en la regiun da Turitg. Quai en connex cun la finamira avisada gia daditg da realisar ina purschida rumantscha analoga als curs da lingua e cultura. Diesch famiglias cun uffants tranter 0 ed 11 onns èn arrivadas a l'inscunter en il circol 5. In'ulteriura occurrenza da contact è en preparaziun.

### **Sfidas**

La QL finanziescha sias activitads per gronda part cun las contribuziuns da commember ordinarias. Il mantegniment da la basa da commembers è damai la premissa per pudair sustegnair occurrenzas er en il futur sco instituziun da promoziun.

### **Soluziuns pussaivlas**

Grazia a la preschientscha da la QL als curs da vacanzas rumantschs e grazia ad in prospect agiuntà a l'ediziun da l'avust da la Terra Grischuna, avain nus pudì augmentar il dumber da commembers da 345 sin 362 visavi l'onn precedent (bundant in tozzel è sorti l'onn passà da la QL, per gronda part sin fundament da la



vegliadetgna).

### **Suprastanza**

A la radunanza generala 2009 è Toni Killias (president 1999-2007) sa retratg era sco commember da suprastanza – e vegnì tschernì unanimamain sco quart commember d'onur da la QL. Dapi lura sa cumpona la suprastanza da la QL sco suonda:

co-presidenta	Madlaina Peer, Turitg
co-president	Kaspar Silberschmidt, Turitg
actuar	dr. Linus Bühler, Oberrieden
assessura	dr. med. Anna Marie Hew, Turitg
assessura	Barbara Kürz, Turitg
assessur	dr. iur. Roman Truog, Turitg

Il gremi è s'inscuntrà durant l'onni da gestiun a trais sedutas (21 da schaner, 26 da matg e 23 da settember). A la radunanza da delegadas e delegads da la LR 2009 a Savognin è la QL stada represchentada cun trais delegads.

[www.quartalingua.ch](http://www.quartalingua.ch)

### **Suprastanza actuala 2010**

co-presidenta	Madlaina Peer, Turitg
co-president	Kaspar Silberschmidt, Turitg
actuar	dr. Linus Bühler, Oberrieden
Assessura	Bettina Berther, Lucerna
assessura	dr. Anna Marie Hew-Winzeler, Turitg
assessura	Barbara Kürz, Turitg
assessur	dr. Roman Truog, Turitg